

AKASHVANI AIZAWL

REGIONAL NEWS BULLETIN

Date – 23/05/2025 Time - 18:30 -18:40Hrs

HEADLINES (EVENING)

- Indian Railway Catering & Tourism Corporation (IRCTC) hotute chuan Mizorama tourism ti hmasawn turin Mizoram sorkar nen an thawkho dawn tih an sawi.
- BJP Mizoram State President Pu Vanlalthmuakan Mizoramah Prime Minister scheme te a nihna tur angin hman that a ni ngai lo a ti.
- Prime Minister Narendra Modia chuan vawiin khan New Delhi-ah Rising North East Investors Summit a hawng
- Enforcement Directorate chuan vawiin khan in leh ram leinaa cheng vaibelchhe 12000 chuanga inbumna thubuaiah Jaypee Infratech, Jaypee Associates Limited leh midang engemawzat an dap.

<><><>

IRCTC

Indian Railway Catering & Tourism Corporation (IRCTC) hotute chuan Mizorama tourism ti hmasawn turin Mizoram sorkar nen an thawkho dawn tih an sawi.

Vawiina Aizawl Press Club-a chanchinbumite an kawmnaah he thu hi sawiin IRCTC Tourist Officer Lalsawmliana Hmar chuan Mizoram sorkara Tourism Department Director nen thawhdunna MoU ziah an tum thu leh, kar thar lo awm turah chuan tihfel an tum thu an sawi a. Inremna hi ziah a nih chuan hmarchhaka khual zin tam zawk an lo luh zel theihna tura mellung pawimawh tak a nih dawn thu an sawi a. Mizorama rel a lo luh huna rela ei leh in leh khualzin chinfel te, ticket buaipui te anmahni kut a nih dawn thu an sawi bawk a ni.

Byte of Lalsawmliana Hmar IRCTC Tourist Officer

IRCTC hotute chuan Mizorama khualzin hruai luh mai bakah mipuite tana remchang tak tur zin theihna programme tha tak tak an neih thu an sawi a. Man man takin ram hrang hrang tlawh theihna tur tour package hrang hrang an neih thu an sawi a. Hei bakah hian Kristian sakhua vuantute tana hmun pawimawh hrang hrang Korinth, Thessalonika, Athens, Rome leh adangte tlawha an zin pui thin thu an sawi bawk a ni.

IRCTC hi Ministry of Railways hnuai Indian Railways peng pakhat niin rail chhung leh station-a ei leh in buaipui bakah ramchhung leh ram pawna khualzin buaipui hna te an thawk a ni.

<><><>

CYMA

Kumin January ni 1 atanga tun thla ni 16 thleng khan Central YMA Kumpulan Sub-Committee leh Central Anti-Drugs Squad (CADS) te chuan ruihhlo cheng nuai 317 chuang man an man tawh.

Central YMA hotute atanga thudawn danin hemi chhunga ruihhlo chi hrang hrang man hi cheng nuai 317 sing 4 sang 7 zanga man hu a ni a. Ruihhlo kaihnawihah hian mi 797 an man tawh a, heng mihring an man zinga 68 chu Excise & Narcotics-ah an pe a, Home leh Centre-ah mi 70 an dah lut a, police department-ah mi 5 an pe a. Mi 265 counselling an pe tawh bawk a ni.

Central YMA hnuai ruihhlo man zingah hian heroin (No. 4) hawng 649, cheng nuai 194 leh sing 7 man hu leh heroin (no. 4) vek, tictac bur 1401 cheng 25 sing 2 sang 1 zariat man hu a tel a. Heng bakah hian AP, Trama leh adangte mum sing 2 sang 6 chuang, Ganja kg 72, Codein bur 2232, sap zu bur 69, local zu bur 364 leh beer can 54 a tel a ni.

<><><>

BJP PRESIDENT

BJP Mizoram State President Pu Vanlalhmuakan Mizoramah Prime Minister scheme te a nihna tur angin hman that a ni ngai lo a ti.

Vawiina an party pisa, Aizawla thu a sawinaah he thu hi sawiin Pu Vanlalhmuaka chuan Housing For All kaltlanga insak tanpuina chu sawrkarin a nih dan turin hmang se, tunah hian Mizoramah in neilo tam takin in an nei ngei tawh dawn a ni a ti a. Free Gas Connection, PM Mudra Loan, PM Kisan/Kisan Credit loan te pawh Central Sawrkar sum kaltlanga chhungkaw intundinna tur a awm tih sawiin nimahsela Mizoram mipui ten an chhawr thei thin lo chu a kalkawngah fello a awm thin vang a ni a ti.

Pu Vanlalhmuaka chuan Mizoramin Central ah Project tam tak theh lut thin mahse Project tam takte chu hmuh a ni ngailo tih a sawi a. Sorkar laipui chuan sum an pek chhuah tur reng reng an enfiahna pakhat chu an sum pek chu tu te nge chhawr thin?tih kha a ni thin a ti a. Mizorama Budget atanga sum tam ber chu Sorkar hnathawk hlawhah kalin mipui tan erawh tlem te chauh a awm thung a ti a. Chutiang chiah chuan Mizoram sum hmuh chu mi tlemte chauhin a an hman theih te, an tangkai pui te chauh a nih thin avangin Project tam tak Mizoramin a hmuh loh phah a ni a ti.

<><><>

MNF

MNF General Secretary MLA hlui, Pu Lalrinawma chuan sorkar kum liamtaa budget-a pass tawh hmasawwna hnathawhna tur pawisa hman loh nia lang cheng vbc 1137 leh nuai 66 chu sawifiah turin sorkar a beisei tih a sawi.

Vawiina an party pisa, Mizo Hnam Run, Aizawla political session hmanah he thu hi sawiin Pu Lalrinawma chuan Sorkar kum liamta kum 2024-2025-a Mizoram hmasawna hnathawhna tur - Capital Expenditure hnuaia ‘Other Capital Expenditure’ atan cheng Vbc 1209 leh nuai 70 (BE) ruahman a ni a ti a. Chutih laiin cheng vbc 72 leh nuai 4 chauh hmanral niin Revised Estimate (RE)-ah a lang si tih sawiin cheng vbc 1137 nuai 66 chu hman loh niin a lang ta a ni a ti a. Budget-a sum beisei chu an hmu pha lo nge an ti lapse zawk tih chu sorkar a zawhna a nih thu a sawi a. Chutiang taka ram leh hnam hmasawna tur sum tam tham hman loha a awm chu, a chhan dik tak mipuite hrilhfiar tura an beisei thu a sawi a ni.

<><><>

KHAWZAWL MJA

Mizoram Journalist Association Khawzawl District chu vawin khan MJA President, Pu C. Lalrambuatsaiha'n a hawng.

Pu C. Lalrambuatsaiha chuan, Khawzawl District MJA hawn a ni ta chu MJA bakah Khawzawl District tan thil chhinchhiahtlak tak a nih thu a sawi a. Chanchinbu mite chu Sorkar kutke pawimawh tak an ni tih sawiin sorkar chu langtlang taka a kal a, dik taka ro a rel theih nan chanchinbu mite chu hmanraw tangkai tak an nih angin Sorkar pawhin a theihna zawn zawnah a duhsak thin a ni a ti a. Hetihrial hian chanchinbu mite chu Sorkar thu thuin an awm tihna a ni lo a, Sorkar kalphunga thil fel tawk lo leh dik tawk lo awm puanzar kawngah an tim mai tur a ni lo a, thil dik lo awm chu huaisen takin an puang chhuak thin tur a nih thu a sawi a ni.

Pu C. Lalrambuatsaiha hian Khawzawl District MJA indan nan MJA General Headquarters hmingin Rs. 20,000 a hlan nghal a ni.

Khawzawl Bawrhsap Pu K. Vanlalþhiana pawhin, Khawzawl District MJA hawn a ni ta chu lawmawm a tih thu a sawi a. Chanchinbu mite chu mipui rilru sukhlek kaihruaitu an nih angin an thu chhuah turah ngaihtuahna fim tak hmang thin turin a chah a ni.

Hawna inkhawmah hian Khawzawl District MJA President atan Pi Lalthlamuani Ralte ruat a ni a, Vice President atan Pu Lalrotluanga, Treasurer atan Pu Rohmingthanga, Secretary atan Tv. Vanlalzawna Ralte bakah Executive Member pahnih Pu KC Ngurbiakzuala leh Pu Lalrinhlua Ralte te ruat an ni.

<><><>

R NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MPCC

MPCC President Pu Lal Thanzara chuan sum an puk ve lovang titu Mizoram sorkarin kum khat chhungin cheng vbc 3133 leh nuai 45 an puk a, mipui tan phurrit an siam a ni a ti.

Vawiina an party pisa Congress Bhavan-a political session an hmanah he thu hi sawiin Pu Lal Thanzara chuan ZPM sorkarin buhfai man a lêt thawka an tihpun avangin sorkarin kum khatah cheng vbch 89 leh nuai 61 a neih belh thu leh buhfai man tihto chu sorkar sum tuakna pakhat a nih thu a sawi a. Tuialhthei man tihsan atangin vbch 26 leh nuai 50 an hmu tih sawiin cess an lak chhan chu kawng siam nan an ti a, kawng a that loh zia erawh a hriat a ni a ti a. Mipuite tan thil man a san phah hle zawk a ni a ti.

MPCC President chuan sorkar chu Financial Management lamah an hlawhchham chiang hle tih sawiin hei vang hian mipui sum lengvak a harsat phah a ti a. Chhiah hrang hrang an lak avangin mipui tan khawsak harsatna a thlen tih sawiin he sum harsatna avang hian rukruk a hluar phah a, sum duh avanga ruihtheih thil tawlh a hluar em em a, ruihhlo ti mi pawh an pung chho hle a ni a ti a. Vawiinah chuan kuhva lei ang maia awlsamin drug a hluar a, hausa thar thutte an pung zel a, thalai boral an tam phah hle a, kohhran pawh a mangan phah hle a ni a ti a. Mipuite hnena an intiamna an tih hlawhtlin dan chu ngun taka ngaihtuah turin Zoram mipuite a ngen thu a sawi a ni.

<><><>

PM

Prime Minister Narendra Modi an vawiin khan New Delhi-a Northeast State 8 te tana Ministry of DoNER in a buatsaih Rising Northeast: Investors Summit 2025a hawng a.

Thusawiin PM Modi a chuan ram changkanga India siam turin hmarchhak chu tih changkan a pawimawh a ti a. Investor te chu hmarchhak ah sum tam zawk thehchhuak tura ngenin tunah chuan hmarchhak chu sum peipunna tha tak a ni tawh tih a sawi a. Energy lamah leh semiconductor lamah hmarchhak chu a hmunpui a ni chho mek tih a sawi bawk a ni.

He hunah hian Union DoNER Minister Jyotiraditya Scindia pawhin htu sawiin sawrkarin hmarchhaka hmasawinna ruhrel tihchangtlun tur leh inkalpawhna tha siam turin hma a lak thu a sawi a ni.

Ni hnih awh he summit ah hian hmarchhaka sumdawinna leh sum peipunna lam sawiho a ni ang.

He summit ah hian Chief Minister Pu Lalduhoma pawh a tel a, Planning & Programme Implementation Deptt kaihhruaina hnuaia Mizoram pawhin stall pakhat a hawng ve a. He stall-ah hian Commerce & Industries Department leh Horticulture Department hnuaia Mizoram product hrang hrang te phochhuah a ni a, company lian investment ti duh tur awm te nen stall-ah hian inkawmna hun an hmang thin bawk. Mizoram atangin entrepreneur pali an thu ve bawk a, tlawhtu tam tak an nei tawh a ni.

<><><>

JAYPEE ASSOCIATES

Enforcement Directorate chuan vawiin khan in leh ram leinaa cheng vaibelchhe 12000 chuanga inbumna thubuaiah Jaypee Infratech, Jaypee Associates Limited leh midang engemawzat an dap. Delhi-NCR leh Mumbai huamchhunga Jaypee Associates leh an thawhpuite hmunhma 15 vawiin khan dap a ni a. Kawng danga sum la penga chheprelh thubuaiah heng real estate firm te hi chhui mek an ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 122-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>